

arma sub adversa posuit radiantia quercu.  
 ille deae donis et tanto laetus honore  
 expleri nequit atque oculos per singula volvit,  
 miraturque interque manus et bracchia versat  
 terribilem cristis galeam flammisque vomentem 620  
 fatiferumque ensem, loricam ex aere rigentem  
 sanguineam ingentem, qualis cum caerula nubes  
 solis inardescit radiis longeque refulget;  
 tum levis ocreas electro auroque recocto  
 hastamque et clipei non enarrabile textum. 625

Illic res Italas Romanorumque triumphos  
 haud vatum ignarus venturique inscius aevi  
 fecerat Ignipotens, illic genus omne futurae  
 stirpis ab Ascanio pugnataque in ordine bella.  
 fecerat et viridi fetam Mavortis in antro 630  
 procubuisse lupam, geminos huic ubera circum  
 ludere pendentis pueros et lambere matrem  
 inpavidos, illam tereti cervice reflexam  
 mulcere alternos et corpora fingere lingua.  
 nec procul hinc Romam et raptas sine more Sabinas 635  
 consessu caveae magnis Circensibus actis  
 addiderat subitoque novom consurgere bellum  
 Romulidis Tatioque seni Curibusque severis.  
 post idem inter se posito certamine reges  
 armati Iovis ante aram pateramque tenentes 640  
 stabant et caesa iungebant foedera porca.  
 haud procul inde citae Mettum in diversa quadrigae  
 distulerant — at tu dictis, Albane, maneres —  
 raptabatque viri mendacis viscera Tullus  
 per silvam, et sparsi rorabant sanguine vepres. 645  
 nec non Tarquinius eiectum Porsenna iubebat  
 accipere ingentique urbem obsidione premebat;  
 Aeneadae in ferrum pro libertate ruebant.  
 illum indignanti similem similemque minanti  
 aspiceres, pontem auderet quia vellere Cocles 650  
 et fluvium vinclis innaret Cloelia ruptis.  
 in summo custos Tarpeiae Manlius arcis